

Berita Harian : 23 Ogos 2016

**Penulis ialah Dr. Muhammad Arif B. Mohd Hashim, Yang Dipertua
Gabungan Profesional dan Usahawan Bumiputera Anak Selangor (GIBS)**

MASYARAKAT ISLAM PERLU PERTAHAN JATI DIRI, TINGKAT UKHUWAH

Kekuatan ummah adalah teras utama kepada pembentukan jati diri dan kesdalam kalangan orang Islam adalah keperluan utama, sejagat dan kunci kepada pembentukan jati diri dan kestabilan masyarakat Islam. Ia perlu dijadikan agenda utama dalam menyemarakkan semangat harmoni dalam kalangan ummah

Malangnya, umat Islam dan Melayu di negara ini terlalu membuka banyak ruang sehingga pihak lain semakin berani dan berterusan mempersoalkan kesucian Islam dengan harapan nilai utama Islam itu diteliti semula mengikut logik akal mereka dan dibahaskan secara terbuka.

Kita lihat, daripada rungutan terbuka terhadap laungan azan, terdengar pula kritikan terhadap isi kandungan khutbah Jumaat dan ketika sambutan Aidilfitri, ada yang bersedekah duit raya itu berunsur rasuah. Sampai bila ini boleh dibiarkan?

Jika umat Islam di negara ini bersatu dan kuat, pihak-pihak lain tidak berani mempersoal, meremeh atau mencampuri ahl ehwal kesucian Islam.

Kita perlu mengambil pengajaran bahawa ketika pembukaan Palestin oleh Saidina Umar al-Khattab, beliau pernah berikrar untuk memelihara keselamatan para rahib, pendeta serta gereja.

Hormat agama lain

Pada masa sama, beliau sesekali tidak pernah tawar menawar dalam perkara yang melibatkan aqidah umat Islam. Justeru itu, kewibawaan serta ketegasan beliau dalam menegakkan syariat Allah yang adalah rahmat kepada sekalian alam telah menaikkan rasa hormat penganut agama lain terhadap agama Islam.

Allah SWT berfirman yang bermaksud: *‘Dan sediakanlah untuk menentang mereka (musuh yang menceroboh) segala jenis kekuatan yang dapat kamu sediakan dan dari pasukan-pasukan berkuda yang lengkap sedia, untuk menggerunkan dengan persediaan itu musuh Allah dan musuh kamu serta musuh-musuh orang lain dari mereka yang kamu tidak mengetahuinya, sedang Allah mengetahuinya. Dan apa sahaja yang kamu belanjakan pada jalan Allah akan disempurnakan balasannya kepada kamu, dan kamu tidak akan dianiaya’* (surah an-Anfal, ayat 60).

Semua pemimpin Islam dan pihak yang bertanggungjawab termasuk pemimpin politik Melayu perlu tegas mempertahankan kesucian Islam daripada terus diterjah oleh pihak yang cuba mengambil kesempatan dan mempersendakan agama Islam, agama rasmi negara ini yang dilindungi oleh Perlembagaan Persekutuan.

Pemimpin negara ini yang diterajui oleh orang Melayu tidak perlu untuk tawar menawar dengan orang bukan Islam dalam perkara yang berkaitan dengan kedaulatan serta memelihara kesucian agama Islam. Mereka perlu tunjukkan ketegasan dalam memelihara syariat Allah serta kekuatan perpaduan sesama umat Islam yang akan membuatkan agama Islam dihormati di negara ini.

Ia sama pentingnya dengan ibadah lain. Apabila kedudukan Islam dan syariatnya diasak dan dikritik secara terbuka oleh bukan Islam, golongan agamawan perlu bangkit bersuara memberi penjelasan. Mereka tidak boleh lagi berdiam diri kerana ia seolah-olah menggambarkan apa sahaja tindakan dan kenyataan bukan Islam itu betul dan umat Islam berada di pihak yang salah.

Namun, bukan semua bukan Islam gemar dengan karenah rakan seagama mereka yang mencampuri hal ehwal agama Islam. Mereka berpegang kepada konteks kehidupan negara ini yang bersifat majmuk.

Ada masyarakat bukan Islam menerima azan sembahyang lima waktu setiap hari sebagai 'rutin pemakluman' tentang masa. Contohnya kata mereka azan subuh mampu membangkitkan mereka daripada tidur untuk melakukan senaman sebelum ke pejabat. Maka, mereka yang berfikir positif, segalanya akan bersifat positif.

Justeru itu, kita wajar merenung dan berfikir sejenak. Keadaan ini berlaku bukan kerana orang lain. Jangan salahkan pihak lain tetapi orang Melayu dan Islam sendiri yang patut menyalahkan diri sendiri.

Mereka yang membuka ruang dan peluang kepada orang lain untuk mengambil kesempatan atau bak kata pepatah Melayu "menangguk di air keruh". Syariat Islam sememangnya membawa kepada keadilan dan kesejahteraan kepada semua. Tinggal lagi, ia perlu ditegakkan oleh mereka yang benar-benar memahami akan syariat agama Islam yang sebenar-benarnya.